



af. 80

CORONA
CHRISTIANITATIS
in
SERENISSIMO ac INVICTISSIMO
PRINCIPE
AUGUSTO II.

Dei Gratia
POLONIAE REGE ORTHODOXO,
Magno Duce Lithvaniae, Russiae, Prussiae, Masoviae, Samogi-
tiae, Kijoviae, Volhyniae, Podlachiae, Livoniae, Smolensciae, Severiae, Czerni-
choviae &c, Haereditario DUCE SAXONIAE, Juliae, Cliviae, Montium, An-
griae & Vestphaliae, S. R. I. ARCHIMARESCHALLO & ELECTORE,
Landgravio Thuringiae, Marchione Misniae, nec non Superioris & Inferi-
oris Lusitiae, Burgravio Magdeburgensi, Comite Principe Hennebergensi,
Comite Marchiae, Ravensbergae & Barbii, Domino in Ravensstein,
&c. &c.

*inter faustas Regnorum comprecationes,
atq; festivos populorum plausus,*

CORONATO,
ad Ecclesiae militantis subsidium,
terrorem hostium,
Poloniae tutelam & ornamentum,

Caelo Auspice
DESTINATA.

Devotissimo & Subiectissimo S. R. MAJESTATI
Collegio Varsaviensi Societatis JESU
Stylo Panegyrico
DEMONSTRATA

Anno post Coronatum in Carne Verbum 1697.

Torunji, Imprimebat JOANNES BALTHASAR BRESLER.

15. 6. 1697

Eris CORONA GLORIÆ in manu Domi-
ni, & Diadema Regni in manu Dei Tui.

Isaia 62. v. 3.



33.541. III.

SERENISSIME ac INVICTISSIME
R E X,

Domine, Domine Clementissime.



*Adum agimus, dum Coronato Ca-
piti Tuo CORONAM offeri-
mus. In eas scilicet nos Tuæ
Majestatis Amplitudo coniecit
angustias, ut nihil proferre liceat,
quod antè non possederis. Caesarum solia, Re-
gum diademata, Electorum purpuræ, Antisti-
tum tæniæ, tiaræ Principum ac Ducum clavæ,
quin & Romanæ Sedis triregna nihil habent
proprium, quod olim SAXONICO Sanguini
non fuerit commune. Ipsa hæc, quæ Te nihil
minus, quàm Regnum, cogitantem vestigavit.
Corona Lechiæ, nihil insolitum in Domus Au-*

gustæ penetralia invexit. Eò videlicet Coronarium Decus Sarmaticæ Majestatis redijt, unde primum OTHONIS III. manibus in sinum Poloniæ devolutum audivimus. An ergo plus Regnis & maximis valeat Imperijs minima Societas? Parvitatem hæc suam agnovit semper; nunc tamen advertit magis, dum constitit ante Maximum. Si Tuæ par quidquam Magnitudini, aut tantæ non visum Majestati adferremus; felicitatis nostræ commendaremus amplitudinem, non Coronatæ fastigium, Dignitatis. Nunc ubi suppar AUGUSTO nihil, nihil novum cumulatissimæ donis omnibus Fortunæ Tuæ dicare licet, nostra tenuitas Tuorum prodit immensitatem Decorum, umbræ nostræ commendant Solem. Diversam, equidem, à Regio Diademate, CORONAM, Tibi destinavimus. Verùm & hanc Serenissimis prius Virtutibus in Magna Mente Tua effinxisti, quàm nostra in paginam transtulisset Panegyris. Tu nempe Christianorum prius coronasti vota, quàm Tua coronarentur merita: Tu prius sollicitæ Religionis exæquasti desideria,

deria, quàm Tuæ suppar aliquid cogita-
remus Virtuti: Tu auctâ per Lunæ O-
thomanicæ deliquium, Occidentis luce,
itâ Hungariam, itâ Austriam, itâ orbem
implêsti Christianum, ut nihil occurrat
opratiùs, quod liceat precari ab Optimis,
à Maximis sperare. Quidquid igitur
in lucem publicam, cum hac CORONA
CHRISTIANITATIS deducimus,
Tuum esse, Tuis serenatum Splendoribus,
Tuæ non dispar Magnitudini agnosce.
Quòd verò argumenti Majestatem hu-
milioris styli non attingant conamina;
hoc nostrum est, hoc nostræ indicium te-
nuitatis. Si tamen huic etiam patien-
tem oculum & animum non denegaveris,
provolutum eriges Suadæ obsequium, &
novo Benevolentiae prodigio palàm facies,

*nihil Tibi tam humile occurrere po-
tuisse, quod non attollereres. Ita omi-
natur & sperat*

**SACRÆ REGIÆ MAJESTATIS
TUÆ**

Devotissimum

&

Subjectissimum

**Collegium Varfaviense
Societatis JESU.**



HOC demum ad primam
summamq; Orthodoxi or-
bis felicitatem expectaba-
tur, ut illud sibi orbata Prin-
cipe Polonia provideret Caput, quod li-
bero unius gentis coronatum suffragio,
totius coronaret Christianitatis vota.
REX SERENISSIME. Hoc demum
est, quod populorum desideria, quod Ec-
clesiæ suffragia, imò quod Cœlitum in-
terras optabat favor; ut suam solatura or-
bitatem Sarmatia, ipsius quoque Religio-
nis lacrymas detergeret, tot inter bello-
rum ignes, fumantis Europæ malis excus-
sas. Meliorem hæc per hiantia Provin-
ciarum vulnera prospectabat Fortunam,
quæ vel profusi de sanguinis Erythræo e-
mergeret sereniùs; vel mortibus hostium
animata spiraret gloriosius. Sed clade,

culpa

A

non

non semel cumulata cladibus, terrore hostium nonnisi per fata Civium imminuto, nulla vidit, nisi lacrymis respersa solatia; nulla gaudia, nisi funere cruentata. Una tandem illuxit hora, quā Tibi Coronam, Christiano Orbi votorum coronidem datura Lechia, sibi Principem Optatissimum, Ecclesiae Defensorem Inviictissimum delegit. Non unius tunc Sarmatiae, sed orbis pænè totius Europaei vota in Campum Electoralem confluxerunt, ut omnium tenereris affectibus, qui corda omnium rapuisti. Dicam amplius! Ipsos pro Te suffragari Coelites non vanè credidimus, quando ignotus adhuc, ore omnium ferebaris optimus, tantusq; censebaris, qui corda simul & thronum gentis liberae occupaturus, totius etiam Christianitatis vota implere possis. Et certè! quem illa Antemurali suo post fata JOANNIS Magni Propugnatorem, nisi Maximum? quem Nomini Gratiolo ac Fortunato, nisi AUGUSTUM & Secundum? quem Atlanti Christiano, nisi Herculem

eulem Orthodoxum Successorem optaret? Multa sibi, non pauca Lechiæ, Religioni plurima vovebant omnes. Tu PRINCEPS FORTUNATISSIME suffecisti unus omnibus. Te sceptris Polonis admoto, anhela omnium desideria, quieverunt. Nimirum, non Ceris tantum Avitis Coronam præfers. In mores quoque Regios hanc transtulisti, ut spes amplissimas populorum, non minus genere, virtute & rebus gloriose gestis, quam nomine AUGUSTUS coronares.

Non imus externa per omina, quem Te daturus sis singulis? quos de Te facturus sis omnes? vestigaturi. Jam suam agnoscit felicitatem Orthodoxa Religio, quam vix sperare potuisset; jam tenet votorum summam Polonia, quam multo virium laborumque impendio colligendam crediderat; jam tanto de Principe gaudemus omnes, qui summa de fortuna, nihil sibi vult reliquum, præter unam fervandi omnes, ornandi que facultatem. Recessisti à Patriis Saxonie ritibus, ut Tibi
pro-

propiùs, Coeloq; accederes; quid optet
fortunatiùs Ecclesia? Amorem Lechiæ
unà cum Regio paludamento induisti, ut
palam faceres, quo loco eam habeas,
quam pectori admovisti; quid petat o-
ptatiùs Sarmatia? Omnem propè Maje-
statem exuisti Princeps, nè vel invitus
quidpiam ingereres, quod populi arceret
amorem; quid ultra desideremus? Jacti-
tet jam Patrem Patriæ in Augusto, Deli-
cias orbis in Vespasiano, Felicitatem in
Sylla, Magnitudinem in Pompejo, Pieta-
tem in Antonino, Probitatem in Probo;
alia commendet in aliis, tot, imò pluribus
infortuniis, quàm collibus, innixa Roma!
Tuarum non brevis hæc erit laudum sum-
ma, nihil à Te desiderari potuisse.

Si Generis Aviti nobilitatem petimus;

*Claud. de
laud. Sere-
na Reg.*

*Quis venerabilior sanguis? quæ major origo,
Quam Regalis erit? non Te privata dederunt
Limina, nec tantum poterat contingere Nomen
Augustis laribus.*

Illa PRINCEPS prodiisti Domo, quam
nemo habitavit, nisi Maximus; implevit
nemo, nisi summus. Si Morum opta-
mus

mus innocentiam Comitatus magis, quàm
Majestate gravem; illa nobis facilitatis
Regiæ occurrunt prodigia, quæ vidisse,
nec amâsse, piaculum est. Si strictam
hostibus, apertam Civibus precamur Dex-
teram;

— — — *Tua copia vincit* *Claud. de*
Fontem Hermin, tactumq; Mydæ, pluviasq; To- *laud. Stil.*
l. 3.
nantis:

Obscurat veteres, obscurabitq; futuros
Par donis armisq; manus.

Si purpurâ ostroq; dignas Virtutes vesti-
gamus; illas, latere quamvis ex raræ de-
missionis arbitrio cupias, ubiq; prodis;
hoc maximè, non tamen in publicum, re-
us, quod Tuum sub Murice circumferas
Proditorem. Si demum Religionis ac
Patriæ felicitatem quærimus; tanta jam,
sub primum Regni auspiciis, utriusq;ve
dedisti incrementa, quanta optare magis
licuit, quàm sperare; aut si sperare potu-
imus, nonnisi à Te debuimus.

Patere nihilominus REX OPTATIS- *Majores*
SIME, ab hisce Dotibus ad Serenissimos *Serenissimi*
Majores Tuos nostra tantisper ascendere *Regis.*

B

gau-

gaudia, ut Tuos posthac splendores meti-
amur rectius, cum tantos præcessisse Ti-
bi Soles viderimus. Tres & videnos, quâ
sacrâ, quâ sæculari insignes Purpurâ, Ro-
mano Imperio Electores dedit Saxonia;
non parva utiqve Nomina, à quibus Ma-
gnitudinem suam mutuari, vel Augustis-
simis non indecorum. Octo Archi-Præ-
fuleis, sex supra decem Pontificiis splen-
doribus Serenissimos numeravit Soles Ec-
clesia; grandia omnino Lumina, quæ ipsi
Justitiæ Soli, multorum in animis obscu-
rato, pleniorē dedere lucem. Quis por-
ro Ducum & Marchionum? quis Princi-
pum, Abbatum, Comitum & Landgra-
viorum inire velit numerum? Fatisceret
levis calamus, sub tot tantorumq; Nomi-
num pondere: erubesceret tot inter Pur-
puras rudioris Minervæ labor: ipsæ quo-
qve vanescerent in tanta luce literarum
umbræ. Non tamen hos intra titulorum
apices Saxonica stetit Amplitudo. Ad
Regum regnorumq; fastigia provolabis
Calame, ut coronatam ibi Magnitudinē
meti-

metiâre. Ansericum Primum Saxoniae *Vixit hic*
 Regem, gentiles adhuc inter umbras, *circa An-*
 renissimum recale; quotvè Luminum *num Mundi*
 succedaneorum fulgoribus diadema pa- *3870.*
 trium illustrârit, recense. Natales hic an- *Reges Sa-*
 te Christi cunas, haud paucis exortus lu- *xoniae ad*
 stris, non interrupta Nepotum serie, no- *Vitigindum*
 vis semper nativi foli foliîve coronam *I. ab Anse-*
 ornavit splendoribus; donec in Vitigin- *rico nume-*
 do respiraturus, Ducalem Trabeam præ- *rantur 24.*
 ferret Regiæ, Imperatorio murice non
 multò post tingendam. Fallax videlicet,
 & rarò sibi diu similis fortunæ favor, hic
 etiam ludere constituit, ubi solus pro glo-
 ria certabat labor. Aurum illud coro-
 narium Principis ut infringeret, ad ferre-
 um Magni Caroli allisit Martem. Cedere *Cum Caro-*
 debuit armatis manibus honoraria fron- *lo Magno*
 tis Tænia. Vicenis & ampliùs fatigatam *24 præliis*
 præliis, Regali cum titulo, dedit dexteram *confluxit*
 Vitigindus, tum demum gloriosius im- *Vitigindus.*
 peraturus, cùm fracto ad inconcussam *Ex Archi-*
 Ecclesiæ Christianæ Petram Gentili sce- *vo Genea-*
 ptro, servire Veritati didicisset. *logico Do-*
mûs Saxo-
nica, im-
presso Anno
1697.

Quan-

*Saxonia
Conversio
ad Christi-
anam fidē.*

Quantis tunc orbem prodigiis, Eccle-
siam gaudiis, Christiana Regna plausibus,
unius implevit Saxoniae felicitas! Ad
coelos imò Coelitesqve, non minimam
lætitiæ partem pertigisse arbitror; quan-
do calcatos per inanium Deorum fastus,
attritum per cæcæ Gentilitatis verticem,
depressum per Ethnici erroris caput, vim
longè gratissimam illaturus Superis de
fonte mystico ascendit Dux Orthodo-
xus. Pudebat jam Fortunam immissæ in
Saxones infelicitatis, quæ tantæ viâ pro-
speritati aperuit. Felicius nempè favere
non potuit, quàm Regni Gentilis felicitatem
invidendo.

Coelum interim tam rei Christianæ,
quàm Saxoniae, nova melioraq; dispo-
nebat gaudia. Protrudebat hæc antea in
tenebras prius, quàm in lucem, Purpura-
tam quoq; Principum Sobolem, quando
apertæ sub diem Veritatis, ignorantiae a-
mabat caliginem, eò magis infelix nomi-
ne, quòd suæ cæcitatis damna non senti-
ret. At ubi oblitam errorum pulvere,
salutis

salutis æviterne fonte pupillam abluit,
 non lucis solùm, sed Honoris etiam Au-
 gusti aspexit meridiem. Tertium dunta-
 xat à Vitigindo Nepotem Christianis
 imbutum sacris vidit Germania; cùm
 fortis invidiam correctura, Saxonici pro
 Regni titulis, amplissimos illi Romani
 Imperii Fasces designavit. Non vulgaris
 hæc præda fuit, quam sylvas oberranti
 HENRICO Aucupi boni Superi destinã-
 runt, ad posteros etiam OTHONES,
 HENRICOS & LOTHARIOS prove-
 hendam. An enim sibi tantum fuisse pi-
 um credamus Vitigindum? Eodem fon-
 te, quo suam initiatus cœlo salutem hau-
 sit, orbi gaudia, Christianitati solatia, Im-
 perio decora, Ecclesiæ columnina, titulos
 Nepotibus, cœlis incolas, terris Indigetes
 ac Tutelares derivavit. Hinc illos O-
 THONES rerum gestarum gloriã No-
 mineqve MAGNOS evexit Imperium;
 hinc summum in terris CHRISTI Vica-
 rium GREGORIUM V. assumpsit Ec-
 clesia; hinc Divos BRUNONEM Anti-
 stitem

*Imperato-
res 6 ex Fa-
milia Saxo-
nica, ut te-
statur An-
tonius Al-
bizius in
Principum
Christianor-
um Stem-
matibus.*

*Gregorius
Papa V. &
Familia
Saxonica.*

*Sancti ex
eadem Fa-
milia.*

*Henricus
II. Hunga-
ros ad fidē
Christianā
incitavit,
Sorore Ste-
phano Regi
desponsata.
Author id.*

stitem Augustanum, BONIFACIUM
Archiepiscopum Russiæ, OTHONIS III.
cognatum, & integerrimum KUNE-
GUNDIS castæ Conjugem HENRI-
CUM II. Imperatorem fortiti sunt cœli;
hinc primum Religionis Christianæ au-
spicium Hungariæ, tutela Romæ, opes
Ecclesiis, splendores Templis, dotes am-
plissimæ Coenobiis emerferunt. Fons
hic in Tuo Vertice AUGUSTE PRIN-
CEPS etiamnum coronatur à Polonia,
quæ suum OTHONI III. Saxonici San-
guinis Imperatori Diadema debet.

Sed en! occulta fatorum series tot sæ-
culis involuta, nunc primùm evolvitur.
Illa REX SERENISSIME Majorum
Tuorum manibus illata Corona Sarma-
tiæ, Tuo jam destinabatur Capiti, cum
Primo Poloniarum Regi BOLESLAO
incumberet. Parum etenim felicitati no-
stræ prospectum voluissent Cœlites; nisi
hanc de Te bene merendi facultatem Le-
chiæ providissent. Suos redeunt ad fon-
tes flumina; ad Solem recurrunt Sidera;
coelo-

cœlorum orbes, cùm terram omnem
 perlustrârunt, ad cursûs sui exordia re-
 vertuntur. Idem erat Poloniæ reliquum;
 ut variis domi forisqve natorum Princi-
 pum Familiis oblatum Diadema, illi tan-
 dem inferretur Profapiæ, quâ primùm
 prodiisse visum. Reddit itaq; vices Sa-
 xoniæ, cùm Tuis à Prædecessoribus ac-
 ceptum Majestatis Decus, multâ gloriæ
 accessione clarius, refert dicatqve. Ut
 verò magnorum OTHONIS passuum,
 quibus olim hanc ipsam petiit Sarmati-
 am, recens legas vestigium, intentum cu-
 ris severioribus animum tantisper con-
 cede Musæ.

*Liquesce crudi semita marmoris
 Horrentis inter culmina Carpati,
 Truciq; duratum palæstra
 Ingenium silicis refinge!
 Hic ille multis dives adoreis,
 Centumq; latè clarus honoribus
 Post Martialis signa dextræ
 Ausonijs inarata campis,
 Post bella bellis pulsa, volubilis
 Post damna sortis cæde rebellium
 Pensata, post terras trophæis,
 Laude vias, titulisq; mille*

*Panegyris
 Lyrica O-
 thonis III.
 Imp. qui Co-
 ronam Po-
 loniæ con-
 tulit.*

Cinctas

Cinctas Curules, Sarmatiæ jubar
Novum daturus transiit aureis
Famæ lacertis, gloriæq;
Ponè latus simul excubantis
Innixus armis! Hic OTHO Norici
Caput Senatûs, Arbiter Imperi,
Decusq; Rheti, præliares
Non humili pede pressit oras.

Stetere fixis tunc juga rupibus;
Circum paventes alnus inhorruit
Depexa crines; provolutos
Attoniti stupuere colles

Juxta corymbos. Laurus Hymettio
Perfusa succo deflua subdidit
Tunc colla Majestati, odoras
Frontis opes Paphiæq; pronò

Myrti litârunt vertice, & ebrios
Miti Falerno sternere pampinos
Garvisa vitis, purpuratos
Imperij coluit jugales.

Quin & patentes Lechia nobilis
Implere campos, munera prodigo
Urgere censu, per jacentes
Usq; vias Tyrio probatas

Ardore lanas sternere; plausibus,
Lætòq; mixtis murmure cantibus
Fervere, vicinosq; lingvæ
Obsequijs animare saltus.

Nempe

Nempe ille Rheni, Danubij & vagas
Qui stringit iras; aurea Rhetia
Qui frena tendit, provehitq;
Hercynia per opaca sylva,
Ille aduolutæ Dux Alemannia,
Corona Regum, Gloria Cæsarum,
Bellisq; palmisq; erudita
Sarmaticæ diadema & æqua
Sceptri daturus jura, silentibus
Arctata fibris gaudia solverat,
Ceu quondam anbelos solvit Arcis
Æolia Pater inquilinos.
Liquesce marmor! mollibus imprimat
Ut dextra venis gaudia Lechia,
Serisq; det sæclis legenda
Saxonica monumenta Gentis,
Donec micantem terra det Hesperum,
Fruges Olympus, mellea Trinacris
Et dona perdat Hybla, & omni
Oceanus viduetur unda.

Vide jam PRINCEPS GLORIOSISSI-
ME, ut vivæ semel impressa memoriæ,
immortalia OTHONIS III. Decora, nul-
lis velit sæculorum injuriis obliterari Po-
lonia. Cætera Virtutum, gestorum meri-
torumq; prodigia, Tuorum patrata Ma-
jorum manibus, qui velit complecti, Tu-
am, si potest, Magnitudinem metiatur.

D

Mihi

Mihi certè non possunt videri coliq; non
Maximi, qui Tibi Regiam ad Sceptra &
Coronas stravère viam.

Quanquam, non alienis ad culmen
Regale passibus eluctandum Tibi fuit.
Solo tempore Majores Tui Te præcesse-
runt; quos Tuæ Majestas gloriæ, si fortè
stetissent inglorii, provexisset. Nimirum
non primi sunt hi, quos facis, ad laudis
perennitatem passus. Inerat Tibi

*Ætas pri-
ma Serenis-
simi Regis.*

*Claud. de
laud. Stilic.
lib. 1.*

--- mens ardua semper
*A puero, tenerisq; etiam fulgebat in annis
Fortunæ majoris Honos.*

Tunc jam adultum gloriæ tenebas meri-
diem, cum tantum oriebare; vix primam
ingressus lucem, jam Maximorum auspi-
ciis Luminum Serenissimus. Tunc jam
salutem Christianitatis universæ Te loqui
credebamus, cum adhuc per leges infan-
tiæ deessent verba.

Idem ibid.

*Tunc jam conspicuus, jam tunc venerabilis ibas,
Spondebatq; Ducem celsi nitor igneus oris,
cum necdum gressus corporis firmare
per ætatem licuisset. Rara est prorsus
naturæ felicitas, in ipso rerum tyrocinio,
opus*

opus absolvere; rara operis consummati
conditio, à minimis auspicia non sumpsis-
se. Speciosa quin imò exordia, pudendos
non rarò exitus sortiuntur. Illa sæpenu-
merò dies, cui serenior arrisit Phospho-
rus, pluviis ab Hespero ploratur lacrymis.
Sæpè, quæ triumphales in ramos pullu-
latura videbatur arbos, in crucem feralē
abiit. Quæ purpuræ pretiosum stamen,
ordiri byssus dicebatur, aut vitam elisit
Domini, aut funus adornavit. At Tuæ
Serenitatis primordia nullum unquam
temeravit crepusculum: accensum semel
ab ortu diem, nè brevis quidem umbra
obscuravit. Adhuc enim acceptam cum
fasciis renidentibus Innocentiam morum
non posuisti; adhuc haustum cum lacte
Candorem in frontis sereno prodis: Gi-
gas ille à cunis Animus adhuc eminet, vel
inter Maximos.

Vernantem ætatis floridæ ingressus <sup>Fucentis
studia.</sup> Majum, cum fructus jam dares pro flori-
bus, incertum reliquisti, quid Tibi precari
possent populi? quid deberent? Disfide-
bant

bant passim bene precantium animi, discrepabant vota, destinatis ad Superos suffragiis, quod exorarent, occurrebat nihil. Solos tandem, ut pluribus prodesse, desiderârunt annos: unius tantum ætatis incrementa robustis jam Dotibus optare potuerunt. Crescente ergo cum annis Tuis spe publica, ut exteris quoque Solibus ætatis illius exhiberes prodigia, Bataviam primum, tum Galliam, Hispaniam & Lusitaniam peragrâsti. Rara tamen inter illarum regionum miracula, nihil unquam occurrit majus meliusque Te ipso. Alias ubique gentes, ritus alios & mores diversos populorum, alios etiam ubique coelos deprehendisti; Te ipsum nusquam alium, nunquam non eundem, AUGUSTUM semper invenisti. Quod Sol relictis quaquaversus Virtutis suæ vestigiis, nullam à terris labem contrahat: laudabas Astrorum Principis ingenium, Tuosque simul in mores trahebas exemplum; quando impressâ ubique magnorum Decorum memoria, nec minimum
Sere-

Serenitati Tuæ nævum inspersisti. Idem
omninò ab ultimis Hesperiaë finibus ad
solum patrium remeasti, non solus ta-
men. Comes enim individua Te duxit
omnium admiratio, præcessit Fama, se-
quaces ubiq; laudes honorariaë virtutum
pompaë claudebant agmen. Una fuit
vox omnium, Te universaë quondam
CHRISTIANITATIS CORONAM fu-
turum, terris quàm plurimis inferri de-
buisse, ut primæ mirarentur juventæ De-
cora, quæ jam adulta colere aliquando
oporteret.

Et jam aperta Bellonæ Palæstra am-
plissimum Gloriaë campum Fortitudini
Tuæ offerebat. Achillem Te novum, Chi-
ron Tuus Serenissimus Genitor JOAN-
NES GEORGIUS III. ad Rheni præter-
fluentis littora evocabat, ut primum Vir-
tutis Heroicæ imprimeres in illa arena
vestigium, pronis fluctibus ad sæculorum
memoriam provehendum. Impari ad-
huc Martiis sudoribus ætati Tuæ timuis-
sent omnes, nisi major annis adolescen-

E

tiaë

*Expeditio
bellica An-
no 1689.
Anno æta-
tis 19.*

tiae animus spem de Te maximam fecisset. Tunc orbi universo patuit, Ducales inter Saxoniae fascias, immaturas licet ætate animas, maturas jam gloriæ educari; dum uno primoq; passu facto, cum Serenissimis Imperii Aquilis, Moguntiam Germaniæ, Germaniam securitati, securitatem omnibus, Tibi nominis immortalitatem vendicasti. Coronasti jam eo rerum momento Familiæ, patriæqve vota, cum primo militiæ Tuæ rudimento, alienis etiam à finibus arceres metum, & gestis sine discrimine præliis, pericula hostium securitate Tua geminares. Tenuisset Te, credo, recenti lauro palmisqve cinctum, suo commodo & gloriæ Germania; nisi collecta Christianitatis desideria, Te sibi vindicato, ampliores bene merendi campum de universa Christianitate, in Hungaria designassent. Moerens ibi pallescensqve, sanguineos inter Danubii fluctus, Religio, vindicem à Te poscebat Dextram, quâ frenos Othomanicæ positurus ferociæ, Pietatis simul Orthodoxæ vota.

coro-

coronares. Nec diu publicam promissis
expectationem morabaris. Ut primùm,
post gemina Parentis Fratrisq; Serenissi-
mi funera, pullam Electorali Purpura
commutasti togam; pedem Hungariæ si-
mul & meliorem spem intulisti.

Quàm lentis plerumq; passibus aliena
vestigantur commoda, si calcar privatus
non addat amor. Diu momenta rerum
expenduntur, viarum examinantur di-
scrimina, laborum librantur pondera;
merces quæritur ante meritum, ante cer-
tamen corona. Diu deliberandum dici-
tur, ut citò fiat; optimo sanè consilio, si
facti, non lucri, ratio moras illas expo-
sceret. Signa quidem attolluntur & A-
quilæ; at, nisi locupletis spei aspiret Fa-
vonius, languent in aëre: aut, si languo-
ris tam aperti suppuduit, lentis fluctibus,
non celerem ad suppetias, sed pavidum
ad pericula testantur animum. Scutis ac
parmis Leones inseruntur, leporinum ut
pectus muniant: truces exuviae Pardo-
rum, imbelles lacertos ambiunt, ut ocu-
los

*Expedi-
tio prima in
Hungariã
Anno 1695*

los saltem hostiles capiant, dum manus
laceffere formidant.

Aliis Te passibus ad orbis Christiani
commoda properantem vidit stupuitque
Pannonia PRINCEPS BELLICOSISSI-
ME. Periculorum non levium copia
Tuæ fuit celeritatis illicium: nec moram
à ferro patiebâre; quòd solam hoc premi
teneriq; scires desidiam. Eo vultu, eo a-
nimo imminentibus passim occurrebas
laboribus, quo blandam alii quietem ex-
petunt. Ipsa laceffere videbaris pericu-
la, & quandam iis exprobrare ignaviam,
dum Tua vererentur congredi cum For-
titudine. Satis ad Nominis perennitatem
fuiſſet aliis, numerosas ad bellum sociale
copias destinâsse; Tibi Duces lectissimos
fortissimosq; validæ manui addidisse fu-
isset parum, nisi ipsos ad discrimina Du-
ces præivisses, iisque interesse voluisses
præliis, quæ alii nec audiant sine horrore.
Tantum nihilominus à casu aberas, quan-
tum immortalia in rem Christianam Tua
merita distabant ab humanis. Difficilis
etiam

etiam belli alea, Tibi ludus erat; cujus exitum Occidentis Orthodoxi plausus, Orientis concussi planctus sequebantur. Universis Exercitibus LEOPOLDI Augusti suffragio, omnium voto, præfectus Imperator, fatis etiam imperare videbaris, cum nihil Tibi, licet arduum, offerre possent non vincendum. Hinc potentissimus alioqui barbarorum furor debuit mitescere, ut palmas non nisi occulto suffurari tramite constituerit, quas aperto Marte mereri non audebat. Imaginariam is instruebat aciem, ut illâ Tuam distineret Vigilantiam. Astu interea callidissimo petebat Transylvaniam, de qua nē cogitari simulabat. Argum fefellisset centoculum Othomanicus Sinon: Tuas fallere curas non potuit. Sic omnem armato Veteratori aditum præstruxisti, ut sola ad exitium pateret via. Sed hanc, ceu duram, innutritus deliciis calcare noluit Othomanus. Commodiorem itaq; nocendi vestigaturus occasionem, pedem extulit Hungariâ, hoc tantum felix no-

F

mine,

mine, quòd Tuæ cedendum Magnitudini
ex æquo judicâret.

At Tibi, PRINCEPS VIGILANTIS-
SIME, oculis tantum, non mente exces-
serunt barbari. Maximo semper infamem
Orientis lucem, ut plecteres, sequebaris a-
nimo; locumq; vulneri designabas, quo
totam cum sanguine ferociam effunde-
ret. Otium militi, quietem excubiis, for-
titudini emeritæ dabas præmia: uni Tibi
indulgere non potuisti. Omnes Bellonæ
ardores cum hybernus restrinxisset rigor,
calores in Te Martios non imminuit. Con-
tractiores illi expirantis anni dies, integra
Tibi videbantur sæcula. Imò jam parum
abfuit, ut Solis coeliqve damnare invidi-
am, quòd Tua spe tardiùs votisq; volve-
retur. Solvi quantocyus glaciei vincula
optabas Danubio, ut Tuæ faciliùs defer-
ret laudi materiem. Suum campis ho-
norem, virorem sylvis, aëri clementiam
& agris ubertatem reddi cupiebas, ut Tuæ
Fortitudini succumberent barbari, non
aëris terræq; injuriis.

Tan-

Tandem cū anni refloresceret hila-
ritas; nova Christianitati solatia, cladem *Altera ex-*
Turciæ suscitaturus, arcnam iterum peti- *peditio An-*
isti. Atq; ut bella non repulsum, sed il- *no 1696.*
laturum Te commonstrares, munitissi-
mis Temesvari moenibus latentem quæ-
sisti hostem. Nimirum vallis jam & pa-
ludibus, muris & fossis altissimis egebat.
foedifragus, ut Tuam in vincendo celeri-
tatem moraretur. Nihil tamen Tuæ ob-
stitisse credimus victoriæ, præterquam
quod clausæ in Urbis carcere vincenda
offerretur barbaries. Oderas scilicet
ignava prælia, in quibus fortiter agere
hosti non liceat. Illam tantummodò de-
stinari Tibi optabas lauream, quæ aperto
prognata campo, victore gladio metere-
tur; ut feris innotesceret ætatibus, Te
non tam Urbium, quàm hostium excidia
quæsisse.

Excepit benignior hæc vota polus.
Vix Temesvaro ferales ignes accenderas:
cū celeri edoceris nuntio, innumeras
Othomanorum copias, ipso Sultano Du-
ce,

ce, coactas, ad orbis Orthodoxi, an suam?
properare cladem. Quis Tibi tum ani-
mus? quàm rarus bellandi ardor? quàm
spes indubitata victoriæ? cogitare facili-
us est, quàm enarrare. Extinxisti quàm
primùm destinatum Urbi incendium, ut
Martialem in barbaros iram accenderes.
Pedem à propugnaculo Sultanum versùs
retraxisti, ut non oblatam, sed quæsitam
bene merendi de nobis occasionem arri-
peres. Illud celerem magis, magisq; inci-
tavit animum, quòd summus Orientis
barbari Imperator, rarò ante in Panno-
nia visus, Tuæ cessurus Magnitudini ad-
venisset. Non immeritam tunc in soli-
citudinem, maximorum etiam abiisset
Bellatorum fiducia, quando vel terram
tremere necesse fuit sub hostium ferocis-
simorum multitudine. Tibi tamen secu-
ritatem auxit illa ferocia, victoriæ certi-
tudinem multitudo.

Ut primùm in conspectum, furore
magis, quàm ferro armatorum venisti;
toto in Te Tuosq; impetu effusi, cadendo
etiam

etiam nitebantur opprimere, quos pug-
nando non poterant. Et sanguinis &
vitæ prodigis ipsa in suppetias desperatio
adfuit, ut nihil jam illis formidabile cre-
deres, quos mortis animabat vicinia. Ce-
dere attamen, obstinata licet, æquitati
causæ debuit perfidia, cum iterum, ite-
rumq; Christianis armis repulsa, cruentis
lacrymis flevit audaciam, nihil præter fe-
stinatum exitium ex mortis contemptu
lucrata. Nec erat Othomano fastui quid-
quam reliquum, nisi ut manum Victoris
fugeret celerius, quam antea invaserat.
Sed instans à tergo Sultanus, precibus pri-
mum & pretio, tum minis & ferro fugæ
præclusit viam. Itum ergo reluctante
jam passu iterum in aciem: at simul

— — — *trepido confusa tumultu* *Lucan. lib.*
Castra fremunt, animiq; truces sua pectora pul-
sant

Itibus incertis. Multorum pallor in ore
Mortis ventura, faciesq; similima fato.

Inutile jam levatur ferrum, cum animi ce-
cidissent. Bellici jam frigent ignes, cum
præliandi ardor deferbuit. Verbo expe-
diam.

Victoria
memorabi-
lis Serenis-
simi de Tur-
carum Im-
peratore
inter Te-
mentarum
& Segedi-
num in
Hungaria
Mo. 1696.
d. 22. Aug.

diam. Hostis natali etiam solo gravissi-
mus; Provinciarum plurium, quàm aliū
capitum, Dominus; post tot regnorum,
urbium & populorum excidia nulli non
formidandus, desideratis non paucis suo-
rum millibus à fuga & nocte petiit præ-
sidium, qui nè Superūm quidem eguisse
subsidio videbatur.

Tuas hīc, PRINCEPS VICTORIO-
SISSIME, appello curas, Tua consilia,
Fortitudinem Tuam! Cui post Coeli
Numinisq; favores, post felicissima LE-
OPOLDI Auspicia, tam memorabilem
cladem hostium, Christianorum verò E-
xercituum victoriam debeamus? Si Tua
fateri Modestia reluctatur, toto cantatam
orbe Panegyrim, vel invitus, audi.

Adhucnè pigris veſta jugalibus
Fastidiosas Fama trahis moras,
Lentoq; vocalem Sororis
Aoniæ cytharam morari
Pergis volatu? Discute languidi
Obscura ſomni jurgia! & ætheri
Immixta ſudo, perq; cæli
Perq; ſoli cava glorioſum

Diffun-

*Diffunde carmen! Stravit, Io! Getas
AUGUSTUS, Io! quâ sociabili
Tibiscus undâ liberales
Danubij geminat procellas.*

*Attrita dextro Martis acinace
Post efferatæ cornua Daciæ,
Iras Gelonûm, Tauricanæ
Virus hydræ, furiasq; Thracum*

*Perfregit. Io! Quin Othomanici
Caput furoris, Bellua septiceps,
Prædo ille regnorum, ille terror
Hungariæ, Cilicumq; latro,*

*Terras triumphis, æquora plausibus
Mixtisq; tristi funere cladibus
Sultanus orbem pervagatus
Ore truci gemuisse visus.*

*Cùm pota Besso flumina sanguine,
Et sordidati Bistone vortices
Tabo, cruentis devoluta
Littoribus tumuere ad arma,*

*Armisq; passim capta cadavera,
Ridentis inter Pannoniæ juga,
Ad usque Byzanti liburnas
Purpureo pepulere fluctu.*

*Cessere Lunæ! barbara Concanis
Aurora fatis ingemuit! Geta
Fugæ impotentis exaratos
Tergoribus tulit ipse fastos!*

At

*At Tu sepultum sulphureis caput
AUGUSTE ab umbris effer, ut aureis
Latens emergit quadrigis
Oceano, revehitq₃ puræ
Frontis serenum! Jam Tibi fulgidam
Non indecoro sanguine purpuram
Bellona tinxit; jam calentem
Bistonio trabeam pudore,
Vittamq₃ tabo, & pulchrius aspici
Fædo à Corali vulnere Gloria
Evolvitur ostrum: nec perennes
Fama negat Tibi prona laudes.
Ibis regentis trans vada Nerei!
Trans & Canopi littora fervido
Austa Phæbo, Tethyosq₃
Regna leges pretiosa Victor.
Ut laureatus Phasidos Arbiter,
Colchi, & feroces Heniochi, graves
Et ære Marfi, Te superbo &
Bactra canant animosa cultu.*

At minùs est immites barbarorum ani-
mos domuisse! Libertatem Polonæ gen-
tis in Campis Electoralibus demeruisse,
hæc demum gloriosissima Victoria, hoc
decus immortale. Confluxerat in illud
Avitæ Libertatis theatrum Elector Popu-
lus, daturus scenam, cujus exitum attoni-
tus spectaret orbis. Coronarium Sarma-
ticæ

ticæ Majestatis Decus emerito destinaba-
tur Capiti, suspensis Europæ animis & a-
vidè, quem Honor is posceret, exploran-
tibus. Tu interim, REX SERENISSI-
ME, nova cum hoste meditatus prælia,
nec spem, nec vota in Lechiam destinasti.
Coronare desideria Ecclesiæ Pannonicis
optabas laureis, non auro coronari. Sed
aliter in fatis fuit! Ferro daturus Dexte-
ram, Regale Sceptrum apprehendisti; pro
sago militari Purpuram, pro casside Co-
ronam. Dignitatem prius Regiam, quàm
cogitationem de ambitu admisisti. Mi-
ram Numinis de Te, nobisq; ipsis, Provi-
dentiam tunc adoravimus, colimusqve
adhuc. Eâdem horâ, quâ Tui fama No-
minis percrebuit, Te sibi optavit Candi-
datum, Te dixit libertas Polona Regem.
Non humanæ pro Te desudârunt curæ.
Ille tot millium Electorum corda, ille vo-
ta momento collegit, cui velle fecisse est.
Fortunæ aliquid, aut industriæ mortali
debuissimus, si animos suffragantium de-
mereri, si voces prævenire artibus, si li-
bera

*Electio Se-
renissimi in
Regem Po-
loniæ die
27. Junij.*

bera vota promissis ingentibus præver-
tere voluisses. At quia Religionis, non
Majestatis Te cura occupavit, solis Tuam
nostramq; felicitatem debemus Superis,
qui pro Te tantò perorârunt ferventiùs,
quantò faciliùs, eorum causam adversus
Othomanos acturus in Hungaria, Te Ti-
bi, Tuamqve deesse cupiebas industriam.
Projecisti jam antea errores patrios, nè
vera à patria aberrares; Romanis acces-
sisti ritibus, ne longiùs à fidei veritate ab-
scederes; Coronam à terris cùm non-
dum expectares, alteri, quæ supra terras
est, aptabas Caput. Pulchrâ illâ Religio-
nis mutatione, Religionem veram & Ec-
clesiam, Romam & Patrem Beatissimum
beâsti iterum, quos Martia felicitate Tua
non semel beaveras. Ut nova etiam Sar-
matix provideres solatia, Diadema Tibi
providerunt Coelites, quo ejus & simul u-
niversæ Christianitatis vota coronares.
Quid Romæ? quid Orthodoxis Principi-
bus? quid nomini Christiano & nostræ
gloriæ destinârint Superi, ut primùm Te
suum

suum salutavit Principem Polonia, Spes
publica non fictè enarravit.

*Si qua fides Sipylo, petris si credere nomen
Immortale licet; nè muta oblivio nostræ
Damnet lucra spei, Parijs inscribite venis!
Jam croceis innecta rotis Pallantias auro
Accendit meliore diem; jam pallida mæstæ
Purpureo extinxit Phæbus vestigia noctis
Sidere, & illimi mera gaudia spargit ab ortu.
AUGUSTUS nova sceptrâ capit; patriosq; pero-
Saxonie ritus, Romanis devovet Aris (sus
Seq; suumq; gregem. Quid non Urbs alma Quirini,
Romulidumq; Pater speret? num carmine lævo
Ausonia circum plangent sua vota curules?
Alta Quirinales accendent lumina turres,
Tarpeji salient colles, Capitolia sanctis
Fervebunt studijs, pronum & per Tybridis æquor
Postremis cantanda dabunt solatia Iberis.
Nec sua Sidonijs arctabunt gaudia vittis
Christiadum Reges. Per regna, per æquora &
urbes,
Perq; plagas centum, per climata mille, volabunt
Cantibus immixti plausus, qui sidera metris,
Atq; coronatis pertingant astra triumphis.*

*Sanguineum hinc Error criem depexus,
amicis
Saxonie exactum terris per compita tristis
Insigni cum labe pedem feret; effera donec
Colla premant Superi, donec Pietasq; subactis
Urbibus imperium festino provehat axe.*

Omen au-
spicatum
Christiani-
tati, ex Se-
renissimi e-
lectione.

At

*At Tu millenis innixa Polonia palmis,
 Bellonæ sacrata Domus, dilecta Gradiui
 Sedes, Heroum nutrix, mora certa Geloni
 Plaudere! nec obscuris solatia differ in umbris.
 Roma Tibi grates, laudes Alemannia, cultum
 Hespericæ solvent gentes. Te Rhenus & Ister,
 Te Rhodanus, Bætisq; colet, Tibi Mænus & acer
 Mosa triumphales volvet cum plausibus undas;
 Aucta pio cùm Rege enses & tela reposces
 Bistonij mergenda fibris, cùm signa citato
 Evolves nisu, tremulisq; hastilibus auras
 Et cæli permensa vias, ad prælia curres.
 Plaudere! Tibi cedit Thressi fiducia Martis,
 Threjiq; canes secum defixa lacertis
 Ad rapidum Phlegethonta ferent Tua spicula.*

Plaudere!

*Virtutes Re-
 gia Sere-
 nissimi.*

Quid enim pio, quid forti, quid iusto &
 optimo, coelitusq; dato sub Principe non
 speremus? Non Tibi, ut palam est, REX
 VIRTUOSISSIME coronam obtulim;,
 at spei nostræ, nostris affectibus, desiderii-
 is nostris. Nihil à Te desiderare possu-
 mus, quod antè liberaliùs non induleris;
 nihil à Superis precari licet, quod Tecum
 non contulerint. Pium optavimus Prin-
 cipem; Tu Pietati non vulgari Fortitu-
 dinem adjunxisti Regiam. Pium, fortemq;
 simul

simul petiimus; Tu raram insuper Æquitate
Clementiæ sociatam exhibes. Pium,
justum, fortemq; desideravimus. Tu
in Te das omnia. Adeò non tantum vo-
torum nostrorum exæquas amplitudi-
nem, sed etiam excedis, & votis omnibus
emines, ceu capiti Corona.

Imperium nonnullis, ceu ludos, auspi-
cari placuit. Quasi nihil arduum adferre
posset regnantium alea; temerariis abre-
pti affectibus, Pietatis omnem & coeli cu-
ram ablegarunt. Tibi à sacris ordiri libu-
it, Divisq; prius Caput submittere, quàm
Coronæ. Neq; consilia, quibus interesse
non posset Pietas; neqve oracula, quæ a-
versus à cœlo dictaret animus, admisisti.
Totum illud, quod Regiæ inaugurationis
anteceffit solemnia, octiduum, non cor-
poris pompæq; studium occupavit, sed
animi, cui gratas rarasq; in Purpura lauti-
tias, providit inedia. Sacris interesse cre-
brius, æterno cultui favere impensius, vo-
ta Divis cumulare frequentius, ipsamqve
adeò velare Majestatem, ut fieret suppli-
canti

*Pietas ad-
miranda.*

canti similior, unicum fuit regnaturi solatium, cogitatio una. Profectò nunquam Coelites suis libentiùs interfuisse victimis crediderim, quàm ubi tam augustam de Te ipso dabas victimam. Clarefcere tunc ampliùs altarium splendores debuerunt, cùm supplicem Tuæ Purpuræ lucem affunderes. Dubium etiam & controversum reliquisti, suisnè magis ignibus, an Tuæ fervore Pietatis, arderent luminaria? thura magis, an precum sanctarum fragrantia redoleret? Non verba, sed ardentissima fundebas jacula, quibus cor Dei vulnerabas, ut publicis Ecclesiæ regniq; malis medelam dares. Nec puduit destinatum Regali auro verticem, coronæ publicè supplicantium immiscuisse. Unum etenim ibi Principem esse memineras, omnes supplices; nec bene terrenam Majestatem clarescere didiceras, ubi Deus latere vult suam.

*Monificen-
tia profusa.*

Tantæ nihilominùs tamq; eximiæ Pietati succenseres adhuc PRINCEPS RELIGIOSISSIME, si tantùm in Superos
fores

fores pius. Mortales etiam demereri voluisti animos, cum immortales jam Tuos effeceris. Collectanea, si non congenita Tibi, in egenos Munificentia, nunquam se egenam æstimat, nisi dum, quibus succurrat, non videt. Effusis largiore dextera thesauris, adhuc dives est: inopiam omnium cum impleverit, non eget. Nec preces expetit, nec querelas expectat. Audiisse necessitatis alienæ incommoda, Liberalitati Regiæ idem est, quod aliis obtestationes maximas excepisse. Diem, qui Tuas ignoret Gratias, Tuorum è numero dierum excipis. Vitæ imò tempora beneficiis Tibi distinguere placuit, non momentis. Nimirum,

*Non ut Edonis peritura campis
Candidâ incumbit faciliq; solvi,
Cum sitibundus populatur Auster,*

Mole pruina:

*Non ut enatis subito fluentis
Torrida Oenotri tumuere regna,
Quæ tenebrosis iterum resorbet*

Terra cavernis:

*Verum ut æterno lavat amne Ganges
Littus auratum, neq; damna fulvi*

Sentit

Sentit obryzi; pretiosa latè

Munera spargis.

Jam Tuo circum redimita censu

Aureum Phæbi jubar æmulantur

Tecta Divorum, variaq; temnunt

Lumina Phæbes:

Jam serenatæ Pietatis Arces

Squalidum abstersæ posuere limum,

Et salebrosas nitido piarunt

Marmore rimas:

Mille jam Codris pia sors beatos

Depluit nimbos, riguoq; prisci

Rore Saturni rediuviva passim

Sæcla reduxit:

Crescit, & fuso tamen undat auro

Prodigus Gangis sinus, evoluti

Ostijs centum neq; pertimescit

Damna metalli.

Regna quis parvi Jovis inquieto

Nunc vocet questu, cerebroq; natæ

Poscat immani pretio rigentes

Palladis imbres?

Aurei Tecum rediære PRINCEPS

Sæculi venæ; populi & renatos

Lechiæ gaudent remeasse puris

Fontibus annos.

Comitas
eximia.

Liberalitatem Regiam Comitatus insoli-
tæ gratiâ coronas PRINCIPUM Huma-
nissime. Fortunas amplissimas cùm in-
dies

dies largiaris egentibus, Te ipsum in beneficentiæ Regalis auctarium omnibus profundere non abnuis. Nihil augustis clucescit in Moribus, quod vel intentam Majestati pupillam terreat, vel reverentissimos amores impediat. Timorem ut plurimum Regis nomen devotis subditorum animis insinuat: Tu nomen hoc, quò suaviùs illaberetur auribus, & mentem occuparet faciliùs, humanissimis temperasti Gratiis, ut neq; imperare volueris, nisi volentibus, neq; Rex esse, nisi à metu liberorum. Coronata illa monstra Cæsarum, Neronis & Caligulæ, ut regerent, an premerent? tutiùs, belluis præesse volucrunt, non hominibus, quasi plus foret gloriæ, illigatos timoris freno ducere, quàm liberos ad nutum vocare mortales. Tu Regni Sarmatici GRATIANE, quæ Metus & Pallor extorsit, averfaris obsequia, Tuosqve non credis, quos Timor occupavit. Libertati plus nostræ, quàm Tuæ Majestati prospicis, cum istam bonitate contegis, nè vel aspectu non.

K

gratis-

gratissimo lædatur illa. Quàm illustris
sit Tuæ laus Benevolentiae, Tuorum con-
sule morum speculum, Tui perspice in-
vultus sereno. Publicâ jam Famâ constat,
non adscititiam Tibi famulari, sed in na-
turam transiisse Comitatem. Proinde

Nec sati, neq̃ livida

Umbrosæ querulis jura Proserpinæ

Incusare libet metris;

Aut raptas Lechiæ plangere GRATIAS

JOANNIS vacat: altior

Quando Sarmatiæ Phosphorus aureis

Effulsit penetralibus,

Deductasq̃ polo, non sinè fœnore

AUGUSTI Charites vebit.

Non hîc sanguineis imbribus horridam

Circum Gorgoneus Furor

Torquet Cæsariem: non temerarium

Depexæ caput anguibus

Squalent, aut Stygia torvæ Acherontides

Despumant rabiem face:

Sed flecti faciles undiq̃ Gratiae

Aspirant melioribus

Illapsæ Zephyris; & nebulas procul

Aversata ferociae

Gaudet perpetuis Regia Comitas

Se cinxisse favoribus.

Blandum Cecropio verba fluunt thymo,

Desu-

*Desudant roseis favi
 Inpersi labijs: sub gelido Jove
 Solaturq; feracibus
 Argentes spolijs prodiga Svaritas.
 Mendaci gremio datas
 Quid fallax Charites fabula concinis?
 Hic & Pasithea rosa,
 Et dos Euphrosinae, & dona Aganippidum
 Hic vernant; ubi Regiae
 Spirant ore, manu & lumine Gratiae.*

Quid porro de alijs Magnae mentis Vir- Virtutes a-
lia com-
pendio pro-
positae.
 tutibus? Neque vocare sub calculum in-
 numeras, neque metiri calamo fas est altis-
 simas. Spem omnem tot tantorumque
 Magnitudine Decorum postquam excres-
 cisti, conatus etiam Oratorii Tuam infra
 Majestatem haerere debent. Maximus in
 Te amor Justitiae, Clementiae studium non
 minuit: flagrantissima in coelum Pietas,
 ardores Martios non extinguit; rara in
 Principe fortuna Affabilitas Dignitati
 non officit: labores ardui Tolerantiam,
 summa Felicitas Modestiam, Fortitudi-
 nem Regiam pericula; ipsa temporum
 iniquitas intendit Virtutem. Pulchra sunt
 haec Majestatis prodigia, quae saepius in-
 menti-

mentium coronatarum cœlo optare licuit, quàm adorare. Illud tamen fidem excedit propè, quod extero sub Jove natus, tantum Lechiæ Amorem ipsius intuleris, quantum patriæ laboranti vix Curtii impendant.

Status Patriæ ante Electionem Serenissimi.

Lugebamus per Fœderatæ militiæ vincula, distractum florentissimi Regni ordinem, solutam Reipublicæ unionem, & intima Poloniæ viscera fœdis vulneribus lacerari dolebamus. Scissa vidimus Provinciarum studia, Senatûs consilia, Quiritum vota, vocèsqve. Felicitatem patriam revocare, una mens fuit omnib9, at modus dispar. Mederi malis non paucis placuit, at voluntati facultas non respondit. Tot inter boni publici detrimenta, gaudere meliori sorte non licuit, vix imò sperare licebat. Pleno jam alveo in Lechiam immigrabant pericula, cum qui procellas excirent, infelices non deessent. Dei tandem, non humano, stetit consilio, quòd Te inclinato Poloniæ polo Atlantem acceperimus, & spei pænè

nè perditæ Instauratorem. Felicem illam,
& verè auream diei horam, quæ ferreis
hisce temporibus Principem Aureum ad-
optavit, suisq; orbata solatiis patriæ Pa-
trem!

Quis illo in rerum nostrarum turbi-
ne, nostra commoda, non lucra sua quæ-
sisset? quis nostræ inferri voluisset cali-
gini, si facem propriæ utilitatis Amor
non præferret? Tu Regum Optatissime,
Tuis etiam dispendiis, felicem votis exi-
tum, augustum spei nostræ terminum, e-
merito militi stipendia, securitatem civi-
bus, regno tutelam, quodq; summum est,
illibatum adeò Amorem Lechiæ uno Te-
cum intulisti, ut domesticæ oblitus felici-
tatis, nostræ non cupidus, nisi aucturus
illam, adveneris. Ubicunq; Regium, vel
primo ingressu Tuo fixisti pedem, non
rosæ fallaces, at vera è vestigio faustitas
pullulavit. Quâcunq; vultûs Augusti se-
renum explicas, novos ubiq; colores im-
primis. Nullo adhuc fuisse loco diceris,
quin prodesse. Sub adultæ jam messis
L tem-

*Amor Sere-
nissimi in
Lechiam,
& boni pu-
blici cura.*

*Circum-
stantia in-
gressus Se-
renissimi in
Poloniam.*

tempora, votis publicis evocatus ad sce-
ptra, fines Poloniæ attigisti, novam utiq;
gaudiorum messem daturus omnibus, qui
nè vitam quidem optaveris, nisi omnium
utilitati concessam. Matura Urbibus &
Provinciis ferebas solatia, Augustos
omnes de Te facturus menses, quibus ple-
nam felicitatem metere liceat omnibus,
vel invitis. Nimirum reluctantibus etiam,
& suæ inimicis fortunæ animis, amicus
est Favor Tuus. Ad Solis naturam eve-
ctus, nullâ poli Sarmatici regione orieba-
ris, quin etiâ inassvetam luci publicæ illu-
strares pupillam. Regalē adhuc Purpuram
non indueras, publici tamen amore boni
pectus Regium incalescebat. Scepbris ma-
nus necdum admoveras, nostra tamen
tractabas commoda, fovebasqve. Quid,
ubi Coronæ verticem, murici humeros
submisisti? Totius in Te Regni onera,
cum diademate devolvi patiebâris, ut il-
lo sub cœlo nullus gemeret, Te Atlante;
nemo pondus persentisceret, Te succol-
lante. Arsisse Coronato sub vertice visa
est

est Purpura, Amore magis Civium, quàm
ostro nativo: sceptrâ Tuis inserta mani-
bus, fortunam Patriæ, non fastum fulcie-
bant. Ita nostræ devotus securitati Prin-
ceps, ungi adhuc voluisti, ut illo chrisma-
te, impressa Reipublicæ curares vulnera,
dolorem temperares.

Diem consule, quo Te ad gloriæ Re-
galis stadium perunxit Dominus! Ei sa-
crum deprehendes Nomini, quod velut
OLEUM in terras EFFUSUM, huma-
nas lenit cicatrices, sanatqve. In nostra
Te lucra AUGUSTE cum Nomine Au-
gustissimo tunc effudisti; mala quævis
abolere, labem detergere, mergere peri-
cula, ut purior ex fonte novo emergeret
Fortuna, cæpisti. Nec miror! Illius
suavitate Nominis perungi magis, quàm
oleo, Te sensisti. Hinc pleno in alios e-
andem alveo derivaturus, Tuarum auxi-
sti torrente Gratiarum. Unde jam læti
plausus Urbium, jam festæ, faustæq; po-
pulorum comprecationes, jam omina
fortunatissima, jam demùm solida since-
raq;

*Circum-
stantiæ Co-
ronationis
15. Sept.*

raq; gaudia promanarunt. Sterilem fortè solatiorum nostrorum venam credidissemus, si tam foecundo à fonte originem non duxissent: nunc postquam suum ibi sumpsit auspiciū, ubi Virginis foecundæ honos utilitati hominum accrescit, tota in nos bonorum ubertas defluit, & nunquam exhaustus fons gaudiorum aperitur. Tui iterum ad regni exordium reflecte animum! Lux eadem, quæ Othomanicam olim barbariem sub Vienna protritā viderat, Te nuper ad Thronum Sarmatiæ provectum adoravit. Lux illa, quam Divæ Parentis Nominis, ob laureas Viennenses, triumphalem dixit Ecclesia, Tibi etiam, inter Augustæ Coronationis solemnia, triumphum accendit. Tecum itaq; Ecclesia, Virgo Tecum Victoriosissima, & cum hac cœli in Lechia triumpharunt.

Tam rara triumphi Tui gloria, ut summa orbis Christiani capita pertingeret, tam Sanguinis Affinitatisqve foedere, quàm meritorum Tuorum gratiā devinctos

Etos Principes, habuisti comites, REX
SERENISSIME. Leones DANIAE,
Coronas SVECIAE, BRANDEBURGI-
CORUM Aquilas, SABAUDIAE Cru-
ces, ANGLIAE, PALATINORUM
PRINCIPUM, ANHALTINORUM,
BRUNSVICENSIVM, MECHEL-
BURGENSIUM, LUNEBURGENSE-
IVM, HASSIAE, THURINGIAE, totoq;
late imperio diffusa Decora, Avitis Saxo-
niae Tæniis illigasti. Altiora imò, si libe-
at revolvere sæcula; foederatam Serenis-
simis Majoribus Tuis, Veterum Orientis
Imperatorum, ARRAGONIAE, FRAN-
CIAE, NAVARRAE & SICILIAE Re-
gum gloriam, hæreditario in Te jure, cum
sanguine derivatam, in Tui vocasti socie-
tatem triumphi. Nec Augustissimum
Imperii Sidus, triumphali pompæ radios,
quos Tu extincto non ità pridem in
Hungaria Lunæ Turcicae fulgore adau-
xeras, denegavit. Vicario Majestatis Suae
Lumine, festum faustumq; Inauguratio-
nis Tuæ diem illustravit, omnesqve Ele-

M

ctorum

Etorum Romani Imperiū accendit Ceras,
ut Tibi sceptrā Poloniæ capeſſenti, amica
luce affulgerent. Romana quin etiam
interfuiffe gaudia non vanè credimus,
quæ Tu deſtinato nuper in Urbem ſub-
miſſionis filialis Nuntio, ſuaves inter la-
crymarum imbres, ex innocentiffimo
INNOCENTII XII. pectore provocâſti.

*Recens de
Turcis Vi-
ctoria in
Hungaria
11. Septemb.
1697.*

Uni Tecum Orientis barbari Tyranno
triumphare non licuit, qui amiſſo ad Ti-
biſcum Exercitūs numeroſi flore, eodem
propè tempore, ferales hilaritati ſuæ in-
ferias dedit. Virent adhuc, & oculis ani-
moq; obverſantur recentes palmæ, quas
Duce Fortiſſimo EUGENIO Sabaudia
Principe, Cæſareæ copiae, iisq; Saxonica
militiæ robur ſociatum promeruit. Ma-
xima hæc poſt hominum memoriam, ac
planè prodigioſa de hoſte ferociſſimo
Victoria, quo uſq; in viva poſteriorum
memoria, cæſa Summorum Othomana
Potentiæ Ductorum capita, deleta Janiza-
rorum millia, occupatas caſtrorum opes,
erepta Orientis ſigna, fugatas barbaro-
rum

rum acies, ipsiusq; Sultani, suorum cladi
ingemiscantis, suspiria recensebit, eousq;
Saxonica simul Fortitudinis monumen-
ta leget, palamq; orbi faciet; nec Regni
Tui auspicia sinè clade Othomanorum,
nec Marti Christiano triumphos, sinè Tu-
is suppetiis, obtigisse.

*Si quis Castalidum rore beatior
Lustrabit Gëticis ebria cædibus
Tibisci memoris littora, sanguine &
Tinctas Pannoniæ plagas:*

*Ille & Mæonij carmine barbiti,
Et Famæ volucris murmure, Bistone
Tabo Saxonici Martis adoreas
Depictas vehet altius.*

*Ridebit laceri livida Concani
Centum vulneribus tergora, & impigro
Iras edomitæ frontis in horrida
Calcabit pede Thracia.*

*Ibit Barbarici per vada Nerei
Circum præpetibus vectus Etesijs,
Qua-se-cunq; vago clarus in essedo
Promit Phæbus ab æthere:*

*Unâ & belligeræ sceptræ Poloniæ
Exornâsse manu, concinet; alterâ
AUGUSTUM referet cornua Turcicæ
Confregisse Ferociæ.*

Ec

Et hoc demum ad felicissimæ Coronati-
onis Tuæ solennia desiderabatur, ut cæsi
Orientis initiato Regi non deessent victi-
mæ, & hostis Tuarum fractus copiarum
suppetiis, sanctiora inter libamina hosti-
am daret. Erige jam, Deo Auspice, co-
ronatum Verticem REX SERENISSI-
ME, supra hostes, supra invidiam, supra
fortunam, supra fatum! Coronasti Ec-
clesiæ militantis vota, Christianorum
Principum desideria exæquasti, Poloni-
am Generis, Virtutum ac Meritorum
gloriâ adornasti, spem omnium & expe-
ctationem superasti. Tua tandem co-
ronent desideria Superi, exæquet felici-
tas, colant omnes, amentqve. Voluisse
Te nihil unquam, nisi optimum; vovis-
se Tibi nihil, nisi quod omnibus, nihil
omnibus optasse Te, in aperto est, nisi
quod ipsa optaret Pietas, Virtus peteret,
si foret mortalis. Vive ætates omnium,
qui bono omnium Te natum probas, nec
Regno præesse voluisti, nisi ut prodes-
ses.

Occu-

Occupa Solium non Regni tantum, verum & cordium, hinc Civium affectibus, fatis inde imperaturus. Hoc Regi à Deo dato, hoc Principi Gloriosissimo, hoc factis & Nomine AUGUSTO, Senatus, Quirites & populus vovet, hoc omnes precantur.

At minima JESU Societas, dum Regem alii Gloriosissimum, alii Principem Beneficentissimum, Patrem Patriæ Providentissimum in Te mirabuntur alii, simul omnia prædicabit. Augustos Natales illi, Regiam isti felicitatem, hi Tuæ Fortitudinis prodigia dum venerabuntur, hæc omnia adorabit. Illibatam Morum Innocentiam non pauci, liberalis dexteræ munificentiam plurimi, Comitatus raræ gratiam cum omnes prædicabunt, hæc omnia extollet. Hinc Tibi non gloriam tantum, aut victorias, non annos tantum precatur immortales; sed omnia. Nec voces solum aut vota, nec

N

studia

studia tantum & amores, nec affectus so-
los aut vitam obligat; sed omnia. Se-
ipsam demum, quanta quanta est, Ho-
nori Tuo, Majestati & Gloriæ de-
vovet, & unà secum
universa.



